



Broj: **01/2a-50-3-2-19/12**

01/2-05-1-152/12

Sarajevo: 15. 5. 2012.

ZABILJEŠKA

sa sastanka članova Komisije za vanjske poslove PDPSBiH s novoimenovanim ambasadorima BiH

Sastanak s novoimenovanim ambasadorima BiH održan je 15.5.2012. U ime Komisije za vanjske poslove sastanku su prisustvovali: predsjedavajući Komisije za vanjske poslove Mirza Kušljugić, drugi zamjenik predsjedavajućeg Zvonko Jurišić i članovi Komisije Mladen Ivanković Lijanović i Salko Sokolović.

U delegaciji novoimenovanih ambasadora BiH bili su:

1. Igor Davidović, novoimenovani ambasador BiH pri EU u Briselu;
2. Bisera Turković, novoimenovana ambasadorica BiH u Belgiji;
3. Branko Kesić, novoimenovani ambasador BiH u Izraelu;
4. Jusuf Pušina, novoimenovani ambasador BiH u Bugarskoj;
5. Emir Poljo, novoimenovani ambasador BiH u Kraljevini Norveškoj;
6. Brane Pećanac, novoimenovani generalni konzul BiH u Čikagu;
7. Hrvoje Kanta, novoimenovani generalni konzul BiH u Istanbulu.

Predsjedavajući Komisije **Mirza KUŠLJUGIĆ** je na početku pozdravio novoimenovane ambasadore i kazao da je sastanak Komisije za vanjske poslove s novoimenovanim ambasadorima BiH uobičajena praksa prije njihovog odlaska na dužnost. On je ambasadorima poželio sretan put i dobru saradnju s Parlamentarnom skupštinom BiH, Predstavničkim domom i Komisijom za vanjske poslove. Dodao je da Komisija za vanjske poslove u potpunosti prilagođava svoj rad strateškim prioritetima Bosne i Hercegovine, a to su regionalna saradnja, evroatlantske integracije i ekonomska diplomatija te je u tom smislu pokrenula neke aktivnosti na regionalnom nivou. Predstavio je drugog zamjenika predsjedavajućeg Zvonka Jurišića i Mladena Ivankovića Lijanovića, člana Komisije, i kazao da Komisija već u nedjelju ide u posjetu Hrvatskoj na poziv Odbora za vanjsku politiku Hrvatskog sabora. U tom kontekstu kazao je da bi volio čuti kakvi su njihovi planovi u vezi s ekonomskom diplomatijom, s obzirom da su u posljednje tri godine investicije u BiH pale sa 3,7 milijardi maraka na 350 miliona maraka i da je projekcija za narednih četiri-pet godina vrlo riskantna. Planirano je da 80 % investicija ide u sektor energetike i svaki od projekata je pod upitnikom te moramo svi uraditi nešto u okviru onoga što smo definirali, naglasio je Mirza Kušljugić.

Zvonko JURISIĆ pridružio se pozdravima predsjedavajućeg i izrazio nadu u skoro provođenje presude Evropskog suda za ljudska prava u Strazburu u predmetu Sejdić i Finci protiv BiH, a što je uslov za dobivanje statusa kandidata u EU. Dodao je da to nije jedini problem jer postoje i drugi vidovi diskriminacije i da je moguće i njih otkloniti skupa s ovim. Kazao je da mi u Parlamentu BiH nastojimo inicirati rasprave i tematske sjednice Parlamenta o pitanju implikacija koje će ulazak Hrvatske u EU imati na BiH. Naglasio je da ambasadori značajnu veliku ulogu u regionalnoj saradnji i ekonomskoj diplomatiji, a koja može pomoći BiH na putu evroatlantskih integracija.

Mladen IVANKOVIĆ LIJANOVIĆ pozdravio je ambasadore i poželio im puno uspjeha. Kazao je da ambasadori imaju čast predstavljati BiH i da je predstavljanje BiH malo složeniji zadatak jer je BiH još uvijek u demokratskom procesu izgrađivanja. Istakao je da je važno da se van Bosne i Hercegovine prikažemo kao jedinstveni iako unutar BiH ima mnogo neusaglašenih pitanja.

Bisera TURKOVIĆ, novoimenovana ambasadorica BiH u Belgiji, pozdravila je predsjedavajućeg i članove Komisije za vanjske poslove i kazala da će svi uraditi najviše što je u datim okolnostima moguće te da svoju dužnost shvataju kao jako odgovoran zadatak. Dodala je da je pomalo zabrinjavajuće to što svi oni slijede smjernice za vanjsku politiku koje su donesene još 2003. godine, s potpisom gosp. Paravca, tadašnjeg predsjedavajućeg Predsjedništva BiH i kazala da je u današnjem turbulentnom vremenu intenzivne globalizacije devet godina učinilo svoje, te da bi te smjernice možda mogle i drugačije izgledati. Istaknula je problem što BiH nema zakon o vanjskoj politici i da biti ambasador zemlje u kojoj ne postoji zakon kojim se reguliraju mnoge odredbe vezane za vanjsku politiku predstavlja problem. Naglasila je da ambasador, ma koliko bio dobar, vrijedan, sposoban i entuzijasta, ne može da zanemari i komponentu smjernica koje dolaze iz zemlje te da su ambasadori odraz unutrašnjeg stanja u zemlji čiji je osnovni zadatak nacionalni interes. Zbog toga je potrebno da taj interes ima zakonski okvir bez kojeg će biti vrlo teško doći do sinhroniziranog djelovanja. Što se tiče ekonomske diplomatije, kazala je da je ekonomska razmjena s Belgijom jako mala, a investicije su simbolične i one su u razmjeni još 50 % niže, na našu štetu. Naglasila je i da je krajnje vrijeme da se neke stvari izbalansiraju i da se postave standardi po kojima se ljudi šalju u DKP-e, jer ako imate ljude koji imaju jezičku barijeru ili nedostatak ekonomskog znanja, uvijek se suočavamo s razočarenjem, ako nemamo tim koji može da uradi posao. Što se tiče Belgije, kazala je da tamo imamo dvoje diplomata od kojih se jedan bavi konzularnim poslovima, a jedan bi trebalo da se bavi svim ostalim te da jedan čovjek ne može ozbiljno da se bavi svim tim zadacima koji su postavljeni pred njega. Na kraju je kazala da problema ima i da će ih biti još više te da je potrebno više nego ikad da se svi povežemo i pokušamo nešto napraviti.

Mirza KUŠLJUGIĆ kazao je da je ovo primjer zbog kojeg se komunikacija između Parlamentarne skupštine BiH i Vijeća ministara BiH treba unaprijediti. Dodao je da je Komisija za vanjske poslove u posljednje dvije godine dala negativno mišljenje po pitanju rada Ministarstva vanjskih poslova BiH, moguće i zbog nedostatka informacija, ali je Komisija raspravljala o tome na osnovu Izvještaja. Ova komisija je prije šest mjeseci pismeno tražila od Predsjedništva BiH i Vijeća ministara BiH da se pokrene ono što je osnova i za rad Komisije, tj. Zakon o vršenju vanjskih poslova, i dobili smo informaciju da je to u proceduri. Što se tiče manjka diplomatskog osoblja u DKP-ima, kazao je da se o tome mora razgovarati s ministrom i unutar Ministarstva vanjskih poslova BiH.

Jusuf PUŠINA, novoimenovani ambasador BiH u Bugarskoj, zahvalio se na dobrodošlici i izrazio zadovoljstvo prisustvom na sastanku i pozdravio članove Komisije za vanjske poslove. Saglasio se s onim što je Bisera Turković rekla i kazao da je ono što on vidi kao problem u predstavljanju BiH u inozemstvu nedovoljna uređenost stranih investicija u BiH, gdje imamo različite propise od općina do kantona i entiteta. Ako tome dodamo nedovoljan broj stručnih ljudi koji će ostvariti komunikaciju sa svim subjektima u našoj zemlji, onda ćemo doći u poziciju kao da ne vladamo situacijom u sopstvenoj zemlji, dodao je Jusuf Pušina. Naglasio je da je naša diplomatija već stasala i da joj ostaje da se potruži da poboljša stvari, gdje bi i međusobna komunikacija bila bolja. Istakao je da je Bugarska znatnim dijelom završila tranziciju i postala članica EU. Kazao je da su se investicije u Bugarskoj od 2004. godine kada je postala članica NATO-a povećale tri puta i sada iznose preko 6 milijardi eura. Uz sve pristupne fondove koje ima od Evrope, koji se kreću do 16,8 milijardi eura, to više nije zemlja kakvu smo nekada znali, dodao je gosp. Pušina. Izrazio je očekivanje da će

veliki broj nezaposlenih i visoko obrazovanih kadrova iz BiH u narednom periodu imati prostora raditi u Bugarskoj. Na kraju je kazao da će mu biti zadovoljstvo i čast predstavljati Bosnu i Hercegovinu i da će se truditi da to uradi na najbolji mogući način.

Brane PEĆANAC, novoimenovani generalni konzul BiH u Čikagu, pozdravio je predsjedavajućeg i članove Komisije za vanjske poslove i kazao da mu je velika čast i još veća obaveza i odgovornost predstavljati Bosnu i Hercegovinu kao generalni konzul u Čikagu. Dodao je da će u okviru svojih stručnih sposobnosti i kompetencija, a u skladu sa smjernicama Predsjedništva BiH, Ministarstva vanjskih poslova BiH i Parlamentarne skupštine BiH, učiniti sve da časno prezentira svoju zemlju. Kao svoj primarni zadatak i obavezu naveo je da će staviti sve kapacitete na raspolaganje državljanima BiH, kojih u Čikagu ima blizu sto hiljada, kako bi što lakše ostvarili svoja prava. Kazao je da su SAD osvjedočeni prijatelj Bosne i Hercegovine, ali da na polju ekonomske diplomatije neće moći mnogo učiniti ako ne budemo povezani i ako ne budemo imali pomoć privrednih subjekata i nadležnih institucija BiH. Na kraju je kazao da nije skeptičan i da se nada da će pored svih teškoća dostojno prezentirati svoju zemlju.

Branko KESIĆ, novoimenovani ambasador BiH u Izraelu, zahvalio se na prijemu i kazao da mu je čast da je po drugi put imenovan za ambasadora BiH. Dodao je da je svjestan specifičnosti države u koju ide, koja će vjerovatno u narednom periodu biti izložena određenim turbulencijama. Naveo je da BiH sa Izraelom ima vrlo malu ekonomsku saradnju i da je privredna razmjena ispod 1% ukupnog našeg izvoza i uvoza. Kazao je da se to može promijeniti, posebno u segmentima koji se odnose na poljoprivredu, vodoprivredu i turizam, te da smatra da od Izraela možemo mnogo da naučimo jer je Izrael posljednjih godina privukao jako veliki broj investicija koje su dale najveću masu kapitala. Na kraju se još jednom zahvalio na prijemu i izrazio nadu u dobru saradnju s Komisijom za vanjske poslove.

Igor DAVIDOVIĆ, novoimenovani ambasador BiH pri EU u Briselu, kazao je da mu je ovo četvrti mandat na ambasadorskoj dužnosti i da mu je svaki sljedeći mandat novi izazov. Dodao je da će se svi problemi, koji su pomenuti u dosadašnjim prezentacijama, prelamati kroz misiju kojom će on rukovoditi. Istakao je da su evropske integracije i neposredno sticanje statusa kandidata za članstvo u EU dominantan vanjskopolitički interes BiH. Dodao je da nikada nijedan problem ne treba biti toliko politički iritantan i kao takav prezentiran našim sagovornicima u EU i da ćemo se valjda bolje kvalificirati kao potencijalni kandidat ili član kada pokažemo da znamo sami rješavati svoje probleme. Naglasio je da, ako smo zainteresirani da dobijemo status kandidata što prije, za pretprijetne fondove, otvaranje pregovora o punopravnom članstvu i sticanje punopravnog članstva, onda moramo imati koncept, plan, cilj, dinamički program. Ako to radimo, moramo se drugoj strani predstaviti kao kvalificiran partner koji opravdano pretendira na status kandidata. Također je naglasio problem manjka kvalificiranih diplomata te potrebu komunikacije između multilaterale i bilaterale. Svi problemi koji se riješe u domenu evropskih integracija bit će podrška dolasku stranih investitora u BiH jer kandidatski status omogućava da su ljudi koji investiraju sigurniji u standard zaštite investicije, u kvalitet proizvoda, u naše ozbiljno učešće, kazao je gosp. Davidović. Na kraju je istakao da je diplomatsko predstavništvo refleksija države koju predstavlja te da nijedna diplomatska mreža ne može biti bolja od države koju predstavlja, ali svoju dužnost može uraditi profesionalno, kulturno, s mnogo odmjerivosti u vlastitom ponašanju, s mnogo takta i s puno diplomatskog znanja. Zahvalio se članovima Komisije i kazao da će biti slobodan da traži podršku u svakom smislu tokom obavljanja svog mandata.

Mirza KUŠLJUGIĆ kazao je da je Komisija za vanjske poslove već donijela zaključak koji treba da usvoji Parlamentarna skupština BiH prema kojem delegacije koje nastupaju u inozemstvu moraju imati zajednički stav u predstavljanju zemlje, a što se tiče povećanja broja diplomatskog osoblja, da do njega može doći samo ako se neka destinacija ukine.

Hrvoje KANTA, novoimenovani generalni konzul BiH u Istanbulu, kazao je da mu je izuzetna čast što je došlo do sastanka s Komisijom za vanjske poslove. Podržao je izlaganja svojih prethodnika i izdvojio četiri funkcije generalnog konzula u zemlji primateljici. Osnovna funkcija je šticeenje interesa države i njenih građana na teritoriji zemlje primateljice. Druga važna stvar je razvijanje ekonomske diplomatije i privredna saradnja. Dodao je da je Turska zemlja u velikom zamahu i najbrže rastuća ekonomija u Evropi, a druga u svijetu. Naglasio je da odlične političke odnose između Turske i BiH ne prati odgovarajuća ekonomska saradnja i tu stvari treba popraviti. Naveo je također problem s manjkom diplomatskog osoblja. Kao treću stvar gdje možemo više učiniti naveo je saradnju na polju nauke, kulture, sporta i informiranja. Četvrta tačka je briga o našim ljudima koji žive u Turskoj, gdje je sreća što imamo pet diplomatsko-konzularnih predstavništava. Pored Ambasade u Ankari i Generalnog konzulata u Istanbulu, imamo još tri počasna konzulata, u Izmiru, Bursi i Konji i uz njihovu pomoć možemo učiniti mnogo na unapređenju saradnje. Na kraju se još jednom zahvalio članovima Komisije na prijemu.

Mirza KUŠLJUGIĆ kazao je da će Komisija za vanjske poslove najvjerojatnije u septembru ili oktobru boraviti u uzvratnoj posjeti Komisiji za vanjske poslove Turske i da je to jedna od zemalja gdje mi želimo ostvariti bolju parlamentarnu saradnju.

Emir POLJO, novoimenovani ambasador BiH u Kraljevini Norveškoj, kazao je da mu je čast i privilegija da sjedi u ovoj grupi uvaženih i eminentnih ambasadora s obzirom da je njegovo diplomatsko iskustvo nešto skromnije u odnosu na njihovo. Dodao je da je u prethodnom periodu radio četiri i po godine u DKP-u u Štokholmu, između 1997. i 2001. godine. Za Kraljevinu Norvešku kazao je da se radi o vrlo ozbiljnoj i organiziranoj državi, jednoj od država koje imaju najveći bruto društveni proizvod u svijetu, koji je u 2011. godini iznosio 317 milijardi eura ili 66 hiljada eura po glavi stanovnika. Istakao je da je Kraljevina Norveška prijatelj Bosne i Hercegovine, da su bilateralni odnosi vrlo dobri i da BiH s Norveškom nema otvorenih pitanja. Naglasio je da je Norveška posebno partner u procesu pridruživanja BiH NATO-u i izrazio nadu da će uspjeti obezbijediti tu podršku do kraja, do članstva BiH u NATO-u, uvažavajući činjenicu da o tome još nije postignut konsenzus na nivou države. Kazao je da Norveška na svoju inicijativu redovno ulaže u BiH svake godine oko 15 miliona eura. To su projekti koje Norveška realizira preko svoje ambasade u Sarajevu, u okviru kojih podržavaju reformu pravosuđa, lokalne uprave, ravnopravnosti spolova itd. Kao svoje prioritete naveo je političku i ekonomsku diplomatiju i kazao da će slijediti smjernice Predsjedništva BiH. Što se tiče ekonomske diplomatije, dodao je da tu postoje velike šanse za saradnju u oblasti turizma, s obzirom da Norveška troši 2,5 hiljade eura godišnje po glavi stanovnika na godišnje odmore. Također je kazao da će se truditi da proširi saradnju na polju nauke, kulture, obrazovanja i sporta. Za parlamentarnu saradnju kazao je da već postoji i da je to nešto na čemu Norvežani posebno insistiraju. Na kraju je još kazao da je ambasada bivše SFRJ u Oslu Ugovorom o sukcesiji pripala Bosni i Hercegovini i da će mu rješavanje tog pitanja biti jedan od prvih zadataka kada dođe u Norvešku.

Mirza KUŠLJUGIĆ iskoristio je priliku da ambasadore upozna s Igmanskom inicijativom i sastankom koji će biti održan u junu u Zagrebu na kojem će učestvovati četiri zemlje potpisnice Dejtonskog sporazuma koje preko svojih parlamenata počinju saradnju po modelu Nordijskog savjeta. Kazao je da misli da to predstavlja najozbiljniju regionalnu inicijativu koju smo mi pokrenuli, a ne koja je nastala iz Pakta stabilnosti ili kao nastavak neke druge aktivnosti. Zahvalio se ambasadorima na ekspeditivnosti i izrazio očekivanje u dobru saradnju u budućnosti.

SEKRETAR KOMISIJE
Merđžana Iglica

Dostavljeno:

- članovima Komisije za vanjske poslove PDPSBiH
- članovima Komisije za vanjsku i trgovinsku politiku, carine, saobraćaj i komunikacije Doma naroda PSBiH
- Ministarstvu vanjskih poslova BiH
- a/a